



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Sumáriu Atividade Mensál
Observasaun ba Parlamentu Nasionál

Maiu 2021

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275
Telefone: 3323883 | 77040735
www.jsmp.tl
info@jsmp.tl
Facebook: www.facebook.com/timorleste.jsmp
Twitter: @JSMPtl

Tabela Konteúdu

Introdusaun	3
A. Reuniaun Plenaria	4
1) 03 Maiu 2021	4
2) 10 Maiu 2021	5
3) 17 Maiu 2021	7
4) 27 Maiu 2021	8
5) 28 Maiu 2021	9
6) 31 Maiu 2021	10
Reuniaun Komisaun A	11
1) 05 Maiu 2021	11
2) 12 Maiu 2021	13
3) 27 Maiu 2021	14
Konkluzau no rekomendasaun	15

Introdusaun

Iha JSMP nia observasaun ba Parlamentu Nasionál (PN) iha Maiu 2021 nota katak, PN realiza reuniaun plenária iha semana ida dala ida de'it bazeia ba Rezolusaun Parlamentu Nasionál Nú. 72/V(3) - kona-ba realizasaun reuniaun plenária no Komisaun sira iha períodu konfinamentu domisiliáriu.

Iha reuniaun plenária sira ne'e, Parlamentu Nasionál halo diskusaun no votasaun ba proposta lei sira mak hanesan *Proposta de Lei Nú.25/V(3) - Que Estabelece O Regime jurídico das associações públicas profissionais no proposta de Lei Nú.26/V(3) - sobre o ordem dos advogados, proposta de Lei Nú.29/V(3) - Segunda alteração á Lei Nú. 11/2009, de 7 de Outubro que aprova a Divisão Administrativa do Território*, inklui Rezolusaun Parlamentu Nú. 71/V(3) – kona-ba espresa rekoñesimentu ba profisionál sira liña frente ba kombate Covid-19 no Projetu Rezolusaun Nú.72/V(3) - kona-ba realizasaun reuniaun plenária no Komisaun sira iha períodu konfinamentu domisiliáriu.

Komisaun A iha Maiu, halo aprovasaun ba relatóriu pareser sira inklui halo audénsia ho parte relevante sira kona-ba *Proposta de Lei Nú.30/V(3ª) - Terceira alteração á Lei Nú. 5/2006, de 28 de Dezembro, sobre Orgãos da Administração Eleitoral, da Proposta de Lei Nú.31/V(3ª)-Primeira Alteração á Lei Nú.6/2016, de 5 de Maio, Lei do Recenseamento Eleitoral e da Proposta de Lei Nú.33/V(3ª) - Sexta Alteração á Lei Nú.7/2006, de 28 de Dezembro, Lei Eleitoral para o Presidente da República.*

A. Reuniaun Plenaria

JSMP iha fulan Maiu konsege halo monitorizasaun ba reuniaun plenáriu Parlamentu Nasionál hamutuk dala neen (6). Iha reuniaun plenária sira ne'e, Parlamentu Nasionál konsege halo aprovasaun iha jeneralidade ezbosu lei sira, inklui rezolusaun sira mak hanesan *Proposta de Lei nú.25/V(3) - Que Estabelece O Regime jurídico das associações públicas profissionais no proposta de Lei Nú.26/V(3) - sobre o ordem dos advogados, proposta de Lei Nú.29/V(3) - Segunda alteração á Lei Nú. 11/2009, de 7 de Outubro que aprova a Divisão Administrativa do Território*, inklui Rezolusaun Parlamentu Nú.71/V(3) – kona-ba espresa rekoñesimentu ba profisionál sira liña frente ba kombate Covid-19 no Projetu Rezolusaun Nú.72/V(3) - kona-ba realizasaun reuniaun plenária no Komisaun sira iha períodu konfinamentu domisiliáriu.

Detallu husi reuniaun plenária sira hanesan tuir mai ne'e:

1) 03 Maiu 2021

Iha 03 Maiu 2021, Parlamentu Nasionál halo reuniaun plenária ho agenda hanesan tuir mai ne'e:

Ajenda período antes ordem do dia

1. Pedidu justifikasaun falta Señor deputadu Antonio dos Santos “55”
2. Voto pesar ba falesimentu Sr. Bento Pereira “Raihenek”
3. Apresentasaun relatóriu Komisaun F kona-ba fiskalizasaun iha Munisípiu Manufahi no Vikeke.
4. Deklarasaun polítika bankada parlamentár sira.
5. Intervensaun diversa husi deputadu sira.
6. Informasaun husi Señor Ministru ba Asuntu Parlamentár no Komunikasaun Sosiál kona-ba kestaun sira ne'ebé depuadu sira foti.

Ajenda Período da ordem do dia

1. Suspensaun funsaun sira señor deputadu Adérito Hugo da Costa ba efeitu prosedimentu judisiál.
2. Diskusaun no votasaun iha jeneralidade ba Proposta Lei Nú.25/V(3) - ne'ebé estabelese Rejime Jurídiku ba Asosiasaun Públika Profisionál sira-nian.
3. Diskusaun no aprovasaun iha jeneralidade ba Proposta Lei Nú.26/V(3) - kona-ba Orden Advogadu sira-nian.

Iha sesaun plenária ne'e, Parlamentu Nasionál hahú ho halo votu pezar ba Saudozu Bento Pereira "Raihenek" ne'ebé mate ona. Hafoin ida ne'e, Parlamentu Nasionál mós halo apresiasaun ba relatóriu fiskalizaun Komisaun F nian ba Munisípiu Manufahi no Vikeke.

Alende ne'e, iha mós deklarasaun polítika husi bankada KHUNTO relasiona ho situasaun agora no husu ba Governu atu fó importánsia ba produktu lokál sira, nune'e la bele depende de'it ba produktu sira mai husi importaun.

Iha ajenda *ordem do dia* Parlamentu Nasionál mós halo levantamentu imunidade ba deputadu Hugo da Costa atu ba hatán iha Tribunal Distrital Dili (TDD) iha 10 Maiu 2021 tuir notifikasaun husi TDD nian.

Parlamentu Nasionál mós halo aprovasaun iha jeneralidade ba proposta rua mak hanesan Proposta Lei Nú.25/V(3) - Proposta Lei Nú.25/V(3) - ne'ebé estabese Rejime Jurídiku ba Asosiasaun Públika Profisionál sira-nian no Proposta Lei Nú.26/V(3) - kona-ba Orden Advogadu sira-nian. Substánsia husi proposta Lei Nú.26/V(3) ne'e atu regula kona-ba profisaun advogadu sira-nian.

Proposta rua ne'e aprova ho votu hanesan de'it, a favor 45, kontra 0 no abstenasaun 0. Hafoin halo aprovasaun iha jeneralidade Meza intrega no baixa hikis ba Komisaun A hodi kontinua halo diskusaun iha especialidade antes halo aprovasaun finál iha plenária.

Iha intervensaun deputadu sira husi bankada Governu (Bankada Fretilin) husu ba Ministériu saúde atu halo teste *swab* ba públika no klínika privada sira ne'ebé eziste iha kapitál Dili. Tanba tuir observaun ikusikus ne'e populaun barak lakohi ba halo tratamentu iha ospital no sentru saúde maibé prefere liu sosa de'it aimoruk iha klínika sira. Ho nune'e husu ba Governu liuhusi Ministériu saúde atu halo teste *swab* masal.

Hatán ba kestaun ne'e, Ministru ba Asuntu Parlamentár no Komunikaun Sosiál hateten sei enkamiña ba Ministériu relevante.

2) 10 Maiu 2021

Iha 10 Maiu 2021, Parlamentu Nasionál halo reuniaun plenária ho ajenda sira hanesan tuir mai ne'e:

Ajenda *Período antes ordem do dia*

1. Pedidu justifikasaun falta señor deputadu Domingos Lemós no Oscar de Araújo.

2. Votu pezar ba falesimentu Sr. Lequi-Olo (Alamau).
3. Votu pezar ba falesimentu Sr. Humberto Delgado Borges de Alburquerque.
4. Votu saudasaun ba loron Mundiál Língua Portuguesa.
5. Apresentasaun relatóriu sira Komisaun D nian kona-ba vizita traballu ba SEFOPE Bekora no Tibar.
6. Deklarasaun polítika bankada Parlamentár sira-nian.
7. Intervensaun diversa deputadu sira-nian.
8. Informasaun husi Señor Ministru ba Asuntu Parlamentár no Komunikasaun Sosiál kona-ba kestaun sira ne'ebé depuadu sira foti

Ajenda Período da ordem do dia

1. Diskusaun no votasaun ba projetu rezolusaun Parlamentu Nasionál Nú.71/V(3) - expresa rekoñesimentu ba profesionál sira liña frente ba kombate pandemia Covid-19 no rekomenda ba Governu atu adota medida sira iha ámbitu prevensaun ba pandemia ne'e.
2. Diskusaun no votasaun ba projetu rezolusaun Parlamentu Nasionál Nú.72/V(3) - kona-ba realizasaun reuniaun plenária no Komisaun sira-nian durante períodu konfinamentu domisiliáriu ne'ebé dekreta ona iha ámbitu Estadu Emerjénsia.
3. Votasaun final global Projetu Lei Nú.25/V(3) - ne'ebé prosede alterasaun dahuluk ba Lei Nú.11/2017 kona-ba Migrasaun no Asílu.

Iha sesaun plenária ne'e, Parlamentu Nasionál hahú ho halo votu pezar ba Saudozu na'in rua, Lequi-Olo (Alamau) no Humberto Delgado Borges de Alburquerque.

Hafoin ida ne'e, Komisaun D ne'ebé trata Asuntu Ekonomia no Dezenvolvimentu apresenta relatóriu fiskalizaun ba SEFOPE, Sentru Nasionál ba Formasaun Profisionál Bekora, Sentru Nasionál Empregu no Formasaun Profisionál Tibar, Sentru Nasionál Lojística, Institutu Nasionál Bambu Tibar.

Alende ne'e, iha mós deklarasaun polítika husi bankada rua, bankada KHUNTO ko'alia kona-ba impaktu husi serka sanitária ba comunidade agrikultór sira no Fretilin ko'alia kona-ba selebrasaun loron mundiál ba língua Portuguesa.

Ajenda período da ordem do dia

Iha ajenda *período da ordem do dia* nian, Parlamentu Nasionál expresa rekoñesimentu ba profesionál liña frente sira ba kombate Covid-19.

Parlamentu Nasionál mós halo aprovasaun ba rezolusaun rua mak henesan Rezolusaun Parlamentu Nú.71/V(3) - expresa rekoñesimentu ba profesionál sira liña

frente ba kombate Covid-19 no rekomenda ba Governu hodi foti medida sira ba prevensaun no kombate pandemia no Projetu Rezolusaun Nú.72/V(3) - realizaun reuniaun plenária no Komisaun sira iha períodu konfinamentu domisiliáriu.

Entretantu iha intervensaun diversas deputadu sira rekomenda ba governu atu presiza halo revizaun ba Lei Traballu nian. Alende ne'e, deputadu sira mós hato'o preokupasaun sira liga ho atendimentu iha Ospital Nasionál Guido Valadares no rekomenda ba Ministériu saúde atu hadi'a sistema atendimentu ba paciente sira iha sala emerjénsia.

Deputadu sira mós preokupa ho rezultadu *swab* ne'ebé sai kleur no prejudika atividade ekonomia. Kestaun seluk mak rekomenda ba Ministériu edukasaun atu tau matan ba eskola sira liuliu lian portugés, tanba liuhusi portugés nia ukun mak Timor-oan sira hatene hakerek to'o kontinua eskola Indonézia nian.

3) 17 Maiu 2021

Iha sesaun plenária 17 Maiu 2021, Parlamentu Nasionál halo aprovasaun iha jeneralidade ba Proposta Lei Nú.29/V(3) - Segunda alterasaun ba Lei Nú. 11/2009, ne'ebé aprova Divizaun Administrativa Teritóriu ho votu afavór 47, kontra 0 no abstensaun 0. Alende ne'e, aprova mós deliberasaun ba suspensaun funsaun deputada Maria Anabela Sávio ba prosesu judisiál ho votu afavór 50, kontra 3 no abstensaun 1, votu branku 1 no nulu 1.

Hafoin ida ne'e iha sesaun lokraik ,kontinua ho apresentasaun relatóriu jerál atividade 2020 husi Komisaun Anti-Korrupsaun (KAK). Iha apresentasaun Komisáriu KAK nian relata kona-ba atividade sira ne'ebé hala'o tiha ona tuir kompeténsia KAK nian.

Atividade hirak ne'e mak hanesan asaun prevensaun no investigasaun kriminál ba krime korrupsaun nian iha forma oiain. Iha krime korrupsaun ne'ebé halo bainhira hala'o kna'ar iha serbisu públiku sira hanesan krime korrupsaun pasivu no ativa husi ajente públiku sira liuhusi forma ilegal no legál, pekulatu, abuzu poder, tráfico influénsia, no partisipasaun ekonómika iha negósiu, konfliktu interese no krime korrupsaun ne'ebé mósu no prátika bainhira hala'o kna'ar privadu iha setór privadu hanesan define ona iha lejislasaun penál nian.

Komisáriu informa katak KAK nia funsionamentu iha tinan 2020 nian ne'e, kaer metin nia devér hodi realiza asaun sira ba prevensaun no sensibilizasaun ba públiku, hametin investigasaun kriminál ba krime korrupsaun no hametin serbisu sira ba apoiu kooperasaun institucional órgaun polisia kriminál espesializada ho instituisaun oiain nasional no internasionál, mezmú nune'e seidak másimu atu hatán ba preokupasaun

públiku nian. Presiza nafatin apoiu no kolaborasaun husi entidade hotu-hotu nian hodi hametin di'ak liutan serbisu sira iha futuru.

Komisáriu ne'e haktuir mós katak durante nia mandatu la halo serbisu mesak maibé sempre hamutuk ho Komisáriu adjuntu, Diretór jerál sira, xefe unidade, espesialista korrupsaun no funsionáriu hotu-hotu ne'ebé halo kna'ar iha KAK.

Iha tinan 2020 KAK define nia prioridade tolu, programa rua, sub-programa ne'en no atividade hamutuk 21. Atividade sira ne'e fasilita teb-tebes serbisu Diresaun no Unidade sira nian iha KAK, hanesan iha serbisu área prevensaun no sensibilizasaun públiku, investigasaun krimínál, no serbisu apoiu kooperasaun institusionál nian ne'ebé kuandu elabora nia planu sira sempre halo alinasaun ba Planu Estratéjiku Dezenvolvimentu Nasionál tinan 2011-2030 no Planu Estratéjiku KAK tinan 2012-2020.

Planu sira ne'e sempre bazeia ba iha vizaun, misaun, objetivu no programa no programa hirak ne'e KAK konsege realiza asaun sira iha prevensaun no sensibilizasaun públiku, investigasaun krimínál ba krime korrupsaun no krime konexu no kooperasaun institusionál hodi kontinua marka prezensa Estadu nian iha esforsu sira luta kontra korrupsaun.

Intervensaun diversu

Iha intervensaun diversu, Prezidente GMPTL hato'o preokupasaun kona-ba kazu tara-an ne'ebé akontese iha Bebonuk, deputada ne'e hato'o lamentasaun ba kazu tara-an ne'ebé oras ne'e sa'e maka'as, husu ba parte relevante atu halo investigasaun ne'ebé kle'an ba asuntu ne'e.

Asuntu seluk mak deputada sira husu kona ba KAK nia serbisu iha parte investigasaun no prevensaun ne'e la'o to'o iha ne'ebé.

Intervensaun husi deputada Olinda Guterres husu atu lalika vota afavór ba pedidu levantamentu imunidade ba deputada Anabela Sávio tanba konsidera deputadu nia kazu ne'e la'ós halo korrupsaun boot. Kazu kona ba enxe mina ho \$40 ne'e nia bele selu. Maski nune'e Prezidente Parlamentu hateten ida ne'e kompeténsia Tribunál nian no PN la presiza atu interven.

4) 27 Maiu 2021

Iha 27 Maiu 2021 Parlamentu Nasionál realiza reuniaun plenária extra-ordinaria ne'ebé ho agenda mak hanesan tuir mai ne'e:

- Votu pesar ba matebian Lourdes Maria de Fatima Assuncao de Jesus Alves " Bi Kiak". Antiga deputada Assembleia Konstituenti no Primeiru Lezislatura.

- Votu pesar ba matebian Eduardo de Deus Barreto "Dusae", Antigo Viseprezidente Parlamentu Nasionál.

Iha intervensaun husi Bankada parlamentár sira ható'o sira-nia sentidu kondolénsia kle'an ba família matebian, partidu Fretilin no veteranu antigu kombatente sira ne'ebé lakon ona eroina di'ak ida ne'ebé durante ne'e luta ba libertasaun nasionál nian no luta ba promove fetu iha Timor-Leste.

Rezultadu vota pesar ba matebian Lourdes Maria de Fatima Assuncao de Jesus Alves " Bi Kiak, aprovalu ho votu favor 43, kontra 0 no abstein 0.

Entretantu iha intervensaun husi bankada parlamentár sira ható'o ba matebian Eduardo de Deus Barreto "Dusae" deputadu ható'o sira-nia sentidu kondolénsia kle'an ba família matebian no partidu CNRT ba veteranu antigu kombatente libertasaun nasionál ne'ebé lakon ona eroi di'ak ida ne'ebé durante tinan 24 luta ba libertasaun nasionál Timor-Leste.

Rezultadu vota pesar ba matebian Eduardo de Deus Barreto "Dusae", aprovalu ho votu favor 43, kontra 0 no abstein 0.

5) 28 Maiu 2021

Reuniaun plenária extra-ordinaria ohin 28 Abril 2021 ho nia ejenda mak hanesan:

- Diskusaun no aprovasaun ba pedidu renovasaun Estadu Emerjénsia husi Prezidente Repúblika.

Objetivu prinsipál husi pedidu renovasaun Estadu Emerjénsia husi Prezidente Repúblika mak halo prevensaun no kombatate pandemia Covid-19 ne'ebé agora dadaun nia número transmisaun lokál aumenta iha Timor laran.

Pedidu renovasaun Estadu Emerjénsia ne'e hahú iha loran 02 Juñu to'o 01 Jullu 2021 ba teritóriu Timor laran tomak ho nia restrisaun sira mak hanesan pedidu autorizasaun renovasaun Estadu Emerjénsia anteriór¹.

Iha intervensaun diversu, deputadu sira-nian ható'o sira-nia preokupsaun ligadu ho efeitu ba vida moris no ekonomia povu nia iha situasaun aplikasaun Estadu Emerjénsia nian ne'ebé lori sofrimentu ba povu kbiit la'ek sira liuliu sira nia moris ba tanba hamlaha.

Deputadu sira mós husu atu aplikasaun serka sanitária no konfinamentu obrigatóriu labele iha tanba sei lori sofrimentu ba comunidade nia moris liu-liu atu halo movimentu

¹ Detallu info kona-ba renovasaun EE iha ne'e: http://www.mj.gov.tl/jornal/public/docs/2021/serie_1/SERIE_I_NO_18_B.pdf

ba mai hodi fa'an sasan no halo atividade ekonomia sira seluk ne'ebé bele fó rendimentu ba sira-nia moris aban bainrua ba sira-nia família no eskola sira mós tenke kontinua.

Hatan ba preokupasaun sira ne'e, Primeiru Ministru (PM) iha nia intervensaun haktuir katak nia parte haree kestaun sira ne'ebé deputadu sira levanta ne'e no kumpriende tebes, maibé iha parte seluk haree ba número mate no moras ne'ebé kontinua sa'e iha nasaun seluk no iha ita-nia rai fó ameasa tebes ba Governu atu halo ka kria jestaun ne'ebé rigór ba polítika oinsa halo prevensaun no kombate pandemia ida ne'e.

PM mós subliña tan katak ho ita-nia nasaun ne'e opta sistema sivilista, nune'e restrisaun sira atu halo hodi lemita direitu povu nian mak liuhusi lei sira se la iha lei sei labele implementa tanba nasaun ne'e bazeia ba lei no apliksaun Estadu Emerjénsia nu'udar kumprimentu lei ida ne'ebé ezeutivu tenke halo atu kumpri hodi implementa.

PM mós husu atu ema hotu tenke apoiu Governu no apliksaun regra sira ne'e atu la'ó ho di'ak tenke iha mós kolaborasaun di'ak ho apoiu Órgaun 4 ne'e hotu la'ós de'it Governu, maibé Prezidente Repúblika, Parlamentu Nasionál no Tribunál nia partisipasaun mós importante atu aplika regra sira ne'e ho di'ak.

Rezultadu votasaun ba aprovasaun pedidu renovasaun Estadu Emerjénsia husi Prezidente Repúblika aprovalu ho votu a favór 35, kontra 0 no absteisaun 21 husi total deputadu presente na'in 56.

6) 31 Maiu 2021

Iha sesaun plenária 31 Maiu 2021, Parlamentu Nasionál halo aprovasaun ba proposta lei ida (1) iha finál globál no resolusaun 1.

Aprovasaun ba proposta ne'e mak hanesan Proposta Lei Nú. 29/V(3ª) - ne'ebé altera Lei Nú. 11/2009 ne'ebé aprova Divizaun Administrativa Teritóriu ho votu a favór 54, kontra 0 no abstensaun 0 no Projeitu Rezolusaun Parlamentu Nasionál Nú. 74/V(3ª) – kona-ba situasaun iha Myanmar ho votu a favór 51, kontra 0 no abstensaun 1.

Parlamentu Nasionál mós baixa ona ba Komisaun A, Proposta Lei Nú.30/V(3ª) - alterasaun datoluk ba Lei Nú. 5/2006, kona-ba Órgaun sira Administrasaun Eleitorál, Proposta Lei Nú.31/V(3ª) - alterasaun dahuluk ba Lei Nú.6/2016 kona-ba Lei Resensiamentu Eleitorál no Proposta Lei Nú. 33/V(3ª) - alterasaun dane'en ba Lei Nú 7/2006 kona-ba Lei Eleitorál ba Prezidente Repúblika.

Iha observasaun nota katak aprovasaun ba proposta lei kona-ba divizaun administrativa teritóriu aprova ho unanimidade iha finál globál. Nune'e Hatulia B sei sai Postu

Administrativu foun no Atauro sei sai Munisípiu foun bainhira Prezidente Repúblika promulga ona lei ne'e.

Iha intervensaun deputadu sira ejize ba Governu atu buka tuir Saudozu sira ne'ebé mate ba rai ne'e nia ruin liuliu Líder Nasionál sira hanesan Nicolau Lobato inklui saudozu sira seluk ne'ebé to'o oras ne'e seidauk hetan sira nia ruin.

Deputadu sira mós preokupa ho prosesu aprendizajen iha situasaun Estadu Emerjénsia no husu atu fó subsidiu ba estudante sira.

Kestaun seluk mak, deputadu sira husu ba Sekretáriu Estadu Komunikasaun Sosiál atu haree didi'ak kona-ba ema sira ne'ebé uza ID falsu iha mídia sosiál hodi trata ema seluk.

Hatán ba preokupasaun hirak ne'e Sekretária Estadu, Mericio Akara hateten preokupasaun hirak ne'e Governu hahú solusiona no balun hato'o ona ba Ministériu relevante sira hodi rezolve.

Reuniaun Komisaun A

Komisaun A Parlamentu Nasionál iha fulan Maiu nia laran halo reuniaun hamutuk dala tolu (3) no nia detallu hanesan tuir mai ne'e:

1) 05 Maiu 2021

Komisaun A Parlamentu Nasionál iha 05 Maiu 2021 halo audénsia públika ho parte relevante sira hodi rona hanoin kona-ba esbosu Lei Estatutu Majistratura Judisiál nian ne'ebé inísia husi Parlamentu Nasionál ho Projetu Lei Nú.21/V/2021. Parte relevante sira ne'ebé hola parte iha audénsia ne'e mak Prokuradór Jerál Repúblika no ekipa, Prezidente Asosiasaun Majistradu Judisiál, ne'ebé mós nu'udar Diretór ba Sentru Formasaun Jurídika no Judisiária (SFJJ), Eis-Prezidente Komisaun Reforma Lejizlativa no ekipa JSMP.

Objetivu husi audénsia públika ne'e mak atu rona hanoin no komentáriu husi parte relevante sira nian kona-ba esbosu lei ne'e molok Komisaun A halo diskusaun iha especialidade. Nune'e, bainhira Parlamentu Nasionál prodús lei ne'e, lei ne'e bele refléta ho di'ak realidade, interese no nesesidade parte hotu ne'ebé norma ne'e regula.

Iha audénsia ne'e, JSMP foti aas tebes Parlamentu Nasionál nia vontade di'ak hodi promove partisipasaun públika, liuliu parte interesadu no relevante sira iha prosesu halo lei. Ida ne'e hanesan parte importante ida ne'ebé bele asegura qualidade lejizlasaun iha termu benefisiáriu sira sente no konsidera katak norma legál sira ne'ebé Parlamentu

halo ne'e refleto ona ho di'ak sira-nia interese no bele responde ho efetivu ba sira-nia nesesidade.

JSMP nia parte, iha apresentasaun, halo observaun jerál de'it ba esbosu lei ne'e. JSMP hanesan mós ho apresentadór sira seluk iha hanoin hanesan kona-ba relasaun entre Lei Organizaun Judisiária ho Lei Estatutu Majistratura Judisiál. Ida ne'e katak Parlamentu tenke aprova uluk Lei Organizaun Judisiária molok diskute no aprova Lei Estatutu Majistratura Judisiál nian. Lei Organizaun Judisiária nu'udar lei ida ne'ebé regula organizaun judisiáriu sira hotu inklui Tribunál, nune'e Lei Estatutu Majistratura Judisiál nian tenke kompatível ka han malu ho Lei Organizaun Judisiáriu.

Kestaun sira seluk ne'ebé JSMP halo nia observaun mak hanesan kestaun direitu juis sira ba feriadu, kestaun apoiu psikolójiku ba autór judisiáriu sirano psikiater bainhira tribunál presiza ba kazu ruma, kestaun atitude ka komportamentu autór judisiáriu sira nian iha prosesu judisiál ba parte sira ne'ebé mai buka justisa no mós kestaun kona-ba funsionamentu Konsellu Superiór Majistratura Judisiál nian durante ne'e.

Relasiona ho kestaun feriadu juis sira nian, JSMP mós konkorda ho hanoin Prezidente Asosiasaun Majistradu Judsiál nian katak loraon 15, mezmuke JSMP nia parte harak propoin loraon 20, maibé ba interese atu asegura asesu justisa ba ema hotu nian, JSMP mós konkorda loraon 15 ne'e. Importante mak iha loraon 15 ne'e juis sira uza la ho enkomodasaun, tanba sira presiza duni deskansa ho hakmatek atu bele livre sira-nia hanoin husi kazu oin-oin ne'ebé sira prosesa ezemplu violasaun seksuál, abuzu seksuál, omisídiu no seluk tan. Nune'e, JSMP mós hanoin alende feriadu importante mós atu bele rekruta mós psikólogo atu bele ajuda hafresku autór judisiáriu sira nia hanoin tanba pezu serbisu todan tebes.

Kestaun atitude ka komportamentu autór judisiáriu sira-nian, JSMP hanoin importante atu tau iha konsiderasaun tanba iha influénsia boot ba konfiansa públiku nian ba serbisu judisiál nian. Bainhira parte sira ne'ebé mai buka justisa la hetan tratamentu ne'ebé di'ak no dignu mak sei fó impaktu ba konfiansa públiku nian hodi mai buka justisa liuhusi justisa formál. Alende ne'e, komportamentu ne'e iha mós relasaun ho pontualidade juis sira-nian iha prosesu julgamentu. Tuir observaun JSMP nian, Prokuradór no Defensór sira bainhira la pontuál sempre hetan xamada ka juis sira hase. Nune'e, JSMP mós kestiona kona-ba kestaun pontualidade husi juis sira-nian no oinsa funsionamentu Konsellu Superiór Majistratura Judisiál relasiona ho kestaun dixiplinár ba juis sira.

Depoide apresentasaun, iha sesaun diskusaun nian, kestaun ne'ebé sai preokupasaun husi kuaze parte hothotu nian mak kestaun rekursu umanu relasiona ho kriaun Supremu Tribunál Justisa (STJ). Nune'e, Diretór Sentru Formasaun Jurídika no Judisiária (SFJJ) husu ba Governu, liuliu ba Parlamentu Nasionál atu bele koloka

orsamentu ne'ebé suficiente hodi bele kria kondisaun ba halo formasaun ida ne'ebé di'ak atu bele kontribui ba hasa'e número autór judisiáriu sira. Tanba ne'e, Diretor SFJJ rekomena ba Parlamentu Nasionál atu bele kria dispozisaun tranzitória ida iha lei ne'e atu bele fó tempu ba SFJJ hodi prepara rekursu. Bainhira harii STJ, juis sira Tribunál Rekursu (TR) nian sei konkore ba no juis sira Tribunál Primeira Instánsia (TPI) sei konkorre fali ba fatin sira juis TR nian, entaun, número juis iha TPI sei menus liután.

Relasiona ho kestaun ne'e, JSMP rekoñese katak Tribunál Supremu Justisa importante atu hari'i no komenta katak lei ne'e halo tenke refleta realidade nune'e bainhira implementa sei laiha impedimentu. JSMP hanoin, Konstituisaun no lei loke dalan ba membru STJ nian ne'ebé bele mós mai husi jurista sira ho rekoñesidu méritu ne'ebé hala'o knaar iha universidade, defensoria no advokasia. Nune'e, saida mak presiza halo mak tenke hamenus tiha kriteria kona-ba tinan esperiénsia serbisu nian ne'ebé aas hodi bele permite jurista sira konkorre no iha selesaun, nune'e la fó impaktu boot ba número juis iha TR no TPI, se lae lei ne'e bele iha tiha maibé sei labele implementa tanba rekursu la to'o.

Kestaun seluk ne'ebé sai mós preokupasaun parte hothotu nian iha audénsia mak kona-ba tratamentu no kondisaun serbisu Defensoria Públiku (DP) nian. Tuir JSMP nian observasaun, DP la hetan tratamentu no kondisaun serbisu ne'ebé hanesan ho Ministériu Públiku no Tribunál nian. Nune'e, JSMP sujere atu bele halo tratamentu ne'ebé hanesan no kria kondisaun serbisu ne'ebé di'ak, liuliu fasilidade hanesan transporte no seluk tan.

Nune'e, bele asegura qualidade serbisu Defensoria nian iha halo defeza ba ema sira ne'ebé buka justisa. Alende kestaun fasilidade, kestaun seluk mak kona-ba per diem ba julgamentu móvel ne'ebé han durasaun tempu fulan tolu (3) ka dala ruma to'o neen (6) mak foin hetan. Ida ne'e la'os ba de'it ba defensor públiku maibé ba mós ba juis sira no ofisiál justisa sira iha instituisaun rua ne'e. JSMP husu atu tau konsiderasaun ba asuntu ne'e, atu nune'e bele motiva sira serbisu ho di'ak liután. Molok termina audénsia ne'e, deputadu sira membru Komisaun A no partikularmente Prezidente Komisaun A konkorda atu Parlamentu avansa uluk ho aprova Lei Organizasaun Judisiária molok diskute no aprova Lei Estatutu Majistratura Judisiál.

2) 12 Maiu 2021

Komisaun A iha loron 12 Maiu 2021 halo *breafing* ba Projetu Lei Nú.19/V(3ª) kona-ba Lei Organizasaun Judisiária no Proposta Lei Nú.28/V(3ª) - kona-ba Organizasaun no Funsionamentu Tribunál sira-nian.

Husi *breafing* ne'e, Dr. Anildo apresenta katak proposta rua ne'e mai husi Prinsípiu Jerál K-RDTL Artigu 118 ne'ebé ko'alia kona-ba kna'ar jurisdisionál no Artigu 123 ko'alia kona ba kategoria Tribunál sira-nian.

Iha Artigu 123 ne'e define kategoria 3 ba Tribunál sira mak hanesan: Tribunál Supremu Justisa (TSJ), Tribunál Superiór Administrativu no Kontas no Tribunál Militar nian. Iha kategoria 3 ne'e tenke obrigatóriu estabese tanba iha K-RDTL dehan ona. Bele iha tan Tribunál Marítimu no Arbitrajen maibé depende ba lejisladór sira. Lei ida-ne'e hanesan lei inan ka sumbriña ne'ebé trata kona-ba kestaun organizasaun judisiáriu nian, tanba lei ida-ne'e mak boot liu iha Órgaun Tribunál Judisiál hotu-hotu. Lei ne'e regula kona-ba parte Tribunál Supremu Justisa nian, Juis kareira nian, Majistradu Ministériu Públiku, ou Juis sira ne'ebé iha kapasidade no esperénsia aas.

Iha reuniaun ne'e, Dr. Anildo rekomenda ba deputadu sira atu eskolla lei rua ne'e ida ne'ebé mak atu opta ba textu substantivu. Nune'e, iha reuniaun ida ne'e, deputadu sira eskolla mak P JL Nú. 19/V(3ª) kona-ba Lei Organizaun Judisiária hodi tau iha textu foun, hodi submete ba iha plenária no diskusaun iha especialidade mak sei dezenvolve di'ak liután.

Reuniaun ne'e hetan partisipasaun husi deputadu na'in 6, kompostu husi deputadu Joaquim dos Santos (Fretilin) hanesan Prezidente Komisaun, deputadu Francisco Miranda Branco (Fretilin), deputadu Dário Madeira (Fretilin), deputadu Jose Pacheco (Fretilin), deputadu Patrocino (CNRT) no deputadu Luis Roberto (KHUNTO).

3) 27 Maiu 2021

Reuniaun sira Komisaun A Parlamentu Nasionál iha 27 Maiu 2021 ho agenda diskusaun mak hanesan:

- Diskusaun no aprovasaun ba relatóriu paraser kona-ba rezultadu diskusaun no apresiasaun ba ezbosu Projetu no Proposta Lei Organizaun Judisiáriu.

Iha apresentasaun, relatóriu deskareve mós rezultadu audénsia sira ne'ebé Komisaun A halo ho instituisaun Estadu sira no sosiedade sivíl mak hanesan JSMP no instituisaun Estadu nian sira mak hanesan Tribunál, Ministériu Justisa, Ministériu Públiku, Defensór Públiku, Koordinadór Sentru Formasaun Jurídika no Judisiáriu, Eis-Ministra Justisa, no Koordinadór Komisaun Reforma Lezislativu no Setór Justisa.

Relatóriu ne'e submete kedas ho testu substitutivu husi Komisaun A ne'ebé rezultadu husi rekonsilia hamutuk projetu no proposta sira ne'ebé Governu no deputadu sira propoin hodi sai testu úniku substitutivu ida atu bele submete ba iha diskusaun hodi prosede ba votasaun iha jeneralidade no bele mós iha diskusaun no votasaun sira iha especialidade.

Testu substitutivu ida ne'e kompostu husi Artigu 93 ho nia Títulu hamutuk VI ne'ebé prevee iha Titulu I kona-ba Prinsípiu sira no Disposisaun Komún, Títulu II kona-ba Tribunál Judisiál, Títulu III kona-ba Tribunál Administrativu no Fiskál, Títulu IV kona-ba Tribunál Militár, Títulu V kona-ba Tribunál Arbitrál no Títulu VI kona-ba Disposisaun Tranzitória no Finál.

Rezultadu votasaun ba relatóriu paraser ne'e aprovalu ho votu afavór 7, kontra 0 no absteinsaun 0 husi deputadu prezensa na'in 7.

Observasaun JSMP ba reuniaun Komisaun A iha lorkraik, laiha ajenda ba reuniaun ka diskusaun tanba iha plenária extra-ordinária ho ajenda sesaun solene ba votu pesar no omenazen ba matebian Eis-deputada Lurdes Maria Assunção de Jesus M. Alves no Eis-Deputadu Eduardo dde Deus Barreto "Dusae", Antigu Viserezidente Parlamentu Nasionál.

Konkluzauun no rekomendasaun

Parlamentu Nasionál funsiona normál no produtivu tebes mezmuke iha situasaun Estadu Emerjénsia no diverjénsia polítika entre partidu opozisaun no partidu sira Governu nian.

Komisaun A kontinua hala'o sira-nia atividade ho nomál hodi halo audénsia ho entidade relavante sira kona-ba projetu no proposta lei sira ne'ebé Meza Parlamentu baixa ba Komisaun atu halo apresiasaun no halo mós aprovasaun nia relatóriu paraser sira.

Nune'e, JSMP rekomenda atu Parlamentu Nasionál kontinua funsiona hanesan ne'e no hala'o nia knaar konstitusionál sira ho di'ak no efetivu liu iha futuru hodi hases tiha interese partidária no tau aas interese nasional hodi bele fokus ba diskute, aprova no finaliza lei importante sira.